

Embargo: Hanya boleh diterbitkan atau disebarkan mulai jam 1200, Jumaat, 11 April 2025



## KENYATAAN MEDIA

KEMENTERIAN EKONOMI  
JABATAN PERANGKAAAN MALAYSIA

Blok C6 & C7, Kompleks C,  
Pusat Pentadbiran Kerajaan Persekutuan, Presint 1,  
62514, Wilayah Persekutuan Putrajaya  
No. Telefon : 03 - 8090 4681

### STATISTIK TENAGA BURUH, MALAYSIA, FEBRUARI 2025

**Penganggur pada Februari terus menurun kepada 532.8 ribu orang dengan kadar pengangguran 3.1 peratus**

**PUTRAJAYA, 11 APRIL 2025** – Penganggur pada Februari terus menurun kepada 532.8 ribu orang dengan kadar pengangguran sebanyak 3.1 peratus, Jabatan Perangkaan Malaysia (DOSM) melaporkan hari ini dalam siaran **Statistik Tenaga Buruh, Malaysia, Februari 2025**. Statistik ini memperihalkan penawaran buruh berdasarkan Survei Tenaga Buruh yang dilaksanakan oleh DOSM.

Mengulas prestasi keseluruhan bagi bulan Februari 2025, Dato' Sri Dr. Mohd Uzir Mahidin, Ketua Perangkawan Malaysia berkata, "Kedudukan tenaga buruh negara kekal stabil selaras dengan perkembangan ekonomi semasa yang menggalakkan. Dalam hal ini, bilangan tenaga buruh pada bulan Februari 2025 berada dalam trend yang meningkat, naik sebanyak 0.3 peratus bulan ke bulan kepada 17.27 juta orang (Januari 2025: 17.22 juta orang). Kadar penyertaan tenaga buruh yang lebih tinggi direkodkan pada bulan tersebut iaitu pada 70.7 peratus (Januari 2025: 70.6%). Peningkatan berterusan dalam bilangan penduduk bekerja dan trend penurunan dalam bilangan penganggur merupakan penyumbang kepada kedudukan positif ini."

Menurut Ketua Perangkawan Malaysia, bilangan penduduk bekerja pada Februari 2025 menunjukkan peningkatan berterusan dengan pertambahan sebanyak 0.3 peratus, menjadikan jumlah keseluruhan seramai 16.73 juta orang, berbanding 16.68 juta orang pada bulan Januari 2025. Pada masa yang sama, bilangan penganggur mengalami penurunan sebanyak 0.2 peratus, berkurang kepada 532.8 ribu orang (Januari 2025: 533.8 ribu orang). Kadar pengangguran kekal pada 3.1 peratus, tidak berubah daripada bulan sebelumnya.

Mengulas mengenai senario guna tenaga, Dato' Sri Dr. Mohd Uzir Mahidin menyatakan bahawa pada bulan Februari 2025, kategori pekerja yang merangkumi 75.2 peratus daripada jumlah penduduk bekerja naik sebanyak 0.2 peratus kepada 12.59 juta orang (Januari 2025: 12.56 juta orang). Begitu juga, bilangan penduduk yang bekerja sendiri meningkat sebanyak 0.6 peratus, mencecah kepada 3.13 juta orang (Januari 2025: 3.11 juta orang).

Mengikut sektor ekonomi, sebahagian besar penduduk bekerja adalah tertumpu dalam sektor Perkhidmatan, terutamanya dalam aktiviti Penginapan dan perkhidmatan makanan & minuman; Perdagangan borong & runcit; dan Maklumat & komunikasi. Trend guna tenaga yang sama juga dilihat dalam sektor Pembuatan, Pembinaan, dan Pertanian, manakala bilangan penduduk bekerja dalam sektor Perlombongan & pengkuarian menurun.

Menjelaskan dengan lebih lanjut mengenai situasi pengangguran pada bulan Februari 2025, Ketua Perangkawan Malaysia menjelaskan bahawa 79.3 peratus daripada bilangan penganggur adalah mereka yang bersedia untuk bekerja dan aktif mencari pekerjaan, atau penganggur aktif. Dalam kategori ini, bilangan tersebut menurun sebanyak 0.2 peratus merekodkan 422.7 ribu orang (Januari 2025: 423.6 ribu orang). Dalam kalangan penganggur aktif, 63.7 peratus adalah mereka yang menganggur kurang daripada tiga bulan, manakala 5.6 peratus berada dalam pengangguran jangka panjang melebihi setahun. Begitu juga, bilangan penganggur tidak aktif, atau mereka yang percaya bahawa tiada pekerjaan tersedia, menurun sebanyak 0.1 peratus kepada 110.1 ribu orang (Januari 2025: 110.2 ribu orang).

Pada bulan Februari 2025, kadar pengangguran dalam kalangan belia berumur 15 hingga 24 tahun tidak berubah iaitu pada 10.3 peratus, merekodkan 298.9 ribu penganggur belia (Januari 2025: 10.3%; 299.3 ribu orang). Pada masa yang sama, kadar pengangguran bagi belia berumur 15 hingga 30 tahun kekal pada 6.3 peratus, dengan bilangan penganggur menurun kepada 401.6 ribu orang (Januari 2025: 6.3%; 402.4 ribu orang).

Bagi kumpulan tidak aktif, bilangan penduduk di luar tenaga buruh menurun sedikit iaitu sebanyak 0.02 peratus kepada 7.15 juta orang (Januari 2025: 7.15 juta orang). Kerja rumah/ tanggungjawab keluarga merupakan komposisi terbesar bagi penduduk di luar tenaga buruh iaitu sebanyak 43.7 peratus, diikuti dengan bersekolah/ latihan pada 41.6 peratus.

Mengakhiri kenyataan tersebut, ekonomi Malaysia dijangka kekal berdaya tahan disokong oleh kemajuan berterusan dalam projek jangka panjang, peningkatan pendapatan isi rumah dan keadaan monetari global yang mereda. Selain itu, struktur ekonomi negara yang pelbagai dan polisi yang menyokong telah mempengaruhi kedudukan pasaran buruh negara pada bulan tersebut. Kerajaan turut melaksanakan pembaharuan untuk meningkatkan keterangkuman tenaga kerja, mengurangkan


kebergantungan terhadap buruh asing, dan menggalakkan automasi dan mekanisasi. Langkah-langkah ini bertujuan untuk mewujudkan peluang pekerjaan yang berkualiti tinggi dan meningkatkan produktiviti. Oleh itu, prospek pasaran buruh Malaysia dilihat meyakinkan pada bulan-bulan akan datang, disokong oleh dasar dan pelaburan yang mantap dalam industri pertumbuhan tinggi dan bernilai tinggi (HGHV).

Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.


Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.


**Carta 1:** Penduduk bekerja, Malaysia, Januari 2024, Februari 2024, Disember 2024, Januari 2025, Februari 2025



**Carta 2:** Pengangguran, Malaysia, Januari 2024, Februari 2024, Disember 2024, Januari 2025, Februari 2025



**Carta 3:** Luar tenaga buruh, Malaysia, Januari<sup>r</sup> 2024, Februari<sup>r</sup> 2024, Disember<sup>r</sup> 2024, Januari 2025, Februari 2025



Nota: <sup>r</sup> Semakan semula berdasarkan anggaran penduduk semasa daripada Banci Penduduk dan Perumahan Malaysia, 2020

Dikeluarkan oleh:

**PEJABAT KETUA PERANGKAWAN MALAYSIA**  
**JABATAN PERANGKAAN MALAYSIA**  
**11 APRIL 2025**